

Lès Pépés et l' gadlî.

Gaston Lucy - Echos de la Cité - 3 Julièt 1969

Lu sègneûr du ç'viadje-là (ça s'passot s'la S'mwas), avot dit in côp k'i dêrot l' fûr d'in grand pré k'il avot l'long d'l'êwe, an cadô à tous sès sèrfs. Et vlà poukwè, wê !

In djou k'il ére à l'tchèsse, in gros singlé, k'on z'avot blèssî à mwart, s'è mètu à l' tchèrdjî. Lu sègneur, à courant, s'è apîté dins les coches et volé à l'tère. Si lès sèrfs n'avint nin arivé, lu Sègneûr î passot. C'est an r'counchance du ça, k'il avot fwêt la promèsse.

On djot, d'pwuis toudis, ku dins les crins d'rotche pa d'zeu l'viadje, k'i gn'avot des Pépés, k' ils astint plêjants, mès k' i n' falot nin lz î manker, pasku zès n' mankint jamwès. Is s'ruvindjint toudis, kwé !

A l'campagne, i duschindint co bin dlé l'êwe pou z'êdfî les z'oumes û don bin les wêfî travayî. Et on z'astot justumint à l' fâchîn.ne du fâmeu pré. Ou cwin du pré, dins la haye, i gn'avot in gros tchène rabouyu, in pwârî, coume dju d'jans an Ardène. Lès Pépés v'nint s'î mète à dîje-douze su ène grosse brantche, bin à l'ombrîre, pour wêfî lès fâcheus et les fèneus. Cèt-cîs astint à leu b'zougne et n's'ocupînt nin dès Pépés.

Seul'mint, dins la bande du fèneûs, i gn'avot in djon.ne gadlî, k'ére in pô drole et ki s'avot dit. - Dju vas z'à djower ène bèle âs Pépés, va !
Et tins d'par nute, il è vnu soyî la brantche pou k'ile nu tinje câzu pus.

Lu land'mwin, cand les Pépés ont v'nu s'assîre su la brantche, lu dêrin astot à pon.ne à place ku la brantche è pèté èt tous lès Pépés ont volé à l' valée, c'èst k'è bin fwêt rire les fâcheus.

Ça n'èst nin plê âs Pépés, k'ont sté bin mwès. T'à s' rulvant, i criyint bin fwârt :

« Ku l' cièl est hiôt !

« Ku les z'oumes sont trêtes !

« Anute ci-dlé, mès pus jamwès.

C'est d'pwis ç'djou-là k'il ' ont kité les rotches du viadje et co min.me lu payis t' âtou. Coume tous les çîs ki f'jat des tours âs Pépés, lu gadlî est duv'nu fô, i câzot tout

seu et i n'arètot nin d'fwêre dès bièstrîes. I d'vot pourtant bin sawè k' les Pépés su rvindjat toudis.

Çu n'ère nin sa fête, ou gadlî, si les gurnouyes n'avint pont d'keuwe.

Gaston LUCY

Raponti.yî pa Louwis Bêjot, lu 18 Julièt 1996.